

周  
禮  
完  
解

周禮完解卷七

郝敬習

夏官司馬第四

夏官官象夏也。夏大也。天高日永萬物相見莫大乎夏。國家之事莫大乎軍旅。司馬六軍之長。次宗伯。聖人所謂文德脩而遠人服也。馬行地致遠故以名。夏繼春者也。禮樂昭明于帝鄉。如草木榮華于震。日木氣自東而南當離位。卦象為甲冑。為戈兵。地支屬午。馬為午獸。東方七宿角亢氐房心尾箕。是謂蒼龍。房居中為馬精。心居中為火精。夏火用事與房同舍。龍

馬自東而南行與火并故馬屬夏也午火自南西流  
為坤坤利牝馬西南得朋利征無疆蓋水歸東南而  
坤居西南午火正中暑氣溽蒸水土相得其卦為師  
故司馬所統即司徒司空所兼脩者也地水西行遇  
母復命于父歸于其宅五氣所以運旋周流無間曰  
周禮也辨方正位其斯而已

惟王建國辨方正位體國經野設官分職以為民極乃  
立夏官司馬使帥其屬而掌邦政以佐王平邦國

建國以下解見前篇政正也以正不正政征也以正  
往正馬利用征司馬行政之官也天官無為司徒宗

伯脩之于內司馬奉天布政于四方故其道主蕩平

南方地卑利牝馬之貞其象如此

政官之屬大司馬卿一人小司馬中大夫二人軍司馬

下大夫四人與司馬上士八人行杭司馬中士十有六

人旅下士三十有二人府六人史十有六人胥三十有

二人徒三百有二十人凡制軍萬有二千五百人為軍

王六軍大國三軍次國二軍小國一軍軍將去聲皆命卿

二千有五百人為師師帥率去聲皆中大夫五百人為旅

旅帥皆下大夫百人為卒卒長皆上士二十五人為兩

兩司馬皆中士五人為伍伍皆有長一軍則二府六史

胥十人徒百人

政官卽大司馬其屬謂小司馬以下及衆職七十也  
遞相副貳如五官而此胥徒獨三倍者軍伍事煩也  
行司馬主行列凡制軍以下興師之法卽內政爲軍  
令也司馬所統六軍之衆卽司徒所教六鄉六遂之  
民一軍萬二千五百人卽一鄉萬二千五百家也軍  
將之命卿卽鄉大夫之卿師帥卽州長旅帥卽黨正  
卒長卽族師兩司馬卽閭胥伍長卽比長此司徒所  
以爲重任地所以承天而資四時也周禮之要在乎  
此

按司徒六鄉而遂人之政與鄉老等是鄉遂法同也  
六鄉既爲六軍六遂亦然。是天子十有二軍也。今日  
六軍以六遂之地。外通稍縣都鄙。不全屬王家。賦與  
六鄉異。然六遂地亦廣矣。調度之法不甚詳。愚所以  
謂是書密于近而疎于遠也。

大司馬之職。掌邦國之九灋。以佐王平邦國。制畿封國。  
以正邦國。設儀辨位。以等邦國。進賢興功。以作邦國。建  
牧立監。以維邦國。制軍詰禁。以糾邦國。施貢分職。以任  
邦國。簡稽鄉民。以用邦國。均守平則。以安邦國。比小事  
大。以和邦國。

大司馬九法獨言邦國者。司馬專閭外以平諸侯爲事。諸侯布散五服而平治之法在朝廷。九瀆所以整飭六服。使莫敢不正。故曰佐王平邦國。司馬所以平之者在征伐。先之以九瀆。其不協于法。有討畿邊疆。封。封土爲界。制畿有侯甸男采衛。封國有公侯伯子男。畿封定。則上下遠近。土地人民各正。而六服定。故爲九瀆之首。其次莫如辨名分。儀者。公侯伯子男。及孤卿大夫九儀。大宗伯職云。以九儀之命。正邦國之位。大行人職云。以九儀辨諸侯之命。等諸臣之爵。儀有隆殺。則位有尊卑。設儀以辨位。而後貴賤有等。其

次莫如進賢興功。有德者進，有功者興，則羣情振起，所以作邦國也。乃州立一牧，爲二百一十國之長，國立一監，監之，所以維繫之，使不叛離也。又制立軍政，詰禁姦慝，如天子六軍，大國三軍，小國一軍，所以糾察之，使不亂也。乃施九貢，分職任民，所以責任邦國，使納貢于上也。乃簡閱其實，稽考其數，什伍相聯，以用邦國之民，各均其守，各平其賦，以安邦國之心，親比其小，服事其大，以和邦國之交，所謂九濩也。王以此平邦國，司馬操征伐之柄，以佐之，故法立而邦國莫敢不正也。



按此文則大司馬之權不獨重于五官乎。制畿封國施貢分職兼司徒設儀正位比小事大兼宗伯進賢興功建牧立監兼大宰制軍詰禁稽簡鄉民兼司寇然則六卿之權重無踰于司馬者矣。外典重兵內總大政將無偏重之患不綽之憂與殆非古明王所以設官分職之良規也。作者惟欲借其威以伸王法有司馬九伐然後可行九瀆于邦國。孟子謂以力服人霸者之事威天下以兵革之利而已。故官雖有六所重莫如司徒與司馬。司徒脩內政司馬制軍令司徒為相司馬為將。故宗伯之禮附于司徒之教而兼司

空之事司寇之刑附于司馬之兵而操大宰之柄蓋  
三代以還其治術未有踰于富強者故將相之權特  
重孟子謂由今之道無變今之俗時使之然豈周官  
之舊與王制謂古者選士鄉升之司徒司徒升之司  
馬司馬升之王而後用之則司馬重于六官自古已  
然古禮樂征伐合為一士有文事卽有武備故童則  
習舞長則習射干戚弓矢金革之事幼學而壯行故  
司徒教士與司馬掄材非二途也後世士識一丁耳  
手不習弓矢口不誦韜畧學術所以日偷治道所以  
不如古職此之故儒者耳食周公之禮及其不合妄

事改訂。謂是書爲錯簡。司馬不當掄士。猶夏蟲語冰矣。

以九伐之邊正邦國。馮平弱犯寡則青損之。賊賢害民

則伐之。暴內侵外則壇善之。野荒民散則削之。負固不

服則侵之。賊殺其親則正之。放弑其君則殘之。犯令陵

政則杜之外。內亂鳥獸行則滅之。

馮乘陵也。書滅削也。暴內內暴其國。侵外外侵鄰國

也。壇墠通平其地以爲墀。遷徙之也。負固恃地險不

服。天子侵謂以兵侵其疆境。賊殺其親謂子弟殺父

兄。正正其罪。殘殺也。犯令陵政。犯亂天子之政令。杜

止也。外亂如齊襄公淫女弟，內亂如衛宣公烝父妾。行同鳥獸，無人道也。滅誅絕也。

按九伐之濫罪之大小，與刑之輕重亦不甚允。

正月之吉，始和布政于邦國都鄙，乃縣政象之濫于象。魏使萬民觀政象，挾日而斂之。

解見大宰六官，獨大宗伯不縣象，不觀象以禮制一定歲無可更也。

乃以九畿之籍，施邦國之政職。方千里曰國畿，其外方五百里曰侯畿，又其外方五百里曰甸畿，又其外方五百里曰男畿，又其外方五百里曰采畿，又其外方五百里曰采畿，又其外方五百里曰采畿，又其外方五百里曰采畿。

里曰衛畿又其外方五百里曰蠻畿又其外方五百里曰夷畿又其外方五百里曰鎮畿又其外方五百里曰蕃畿凡令賦以地與民制之上地食者參之二其民可用者家三人中地食者半其民可用者二家五人下地食者參之一其民可用者家二人

此申明上九漙制畿封國詳舉天下邦國形制皆大司馬所掌四方之政也畿邊界籍圖冊政職貢賦也國畿王畿也王畿居中環四外各五千里由近及遠分爲九畿侯甸侯非常甸甸也甸治王田男任也爲王任職采採取也衛防護也蠻靡係也夷無禮貌鎮

守也。蕃蔽也。令賦令侯甸以外。邦國之軍賦。地與民皆謂侯甸以外。小司徒所謂地與民者。王畿之賦。此則大司馬施貢分職以任四方者也。司徒所任。王之六軍。司馬所令。大國三軍。次國二軍。小國一軍之法也。上地。卽不易之地。家百畝也。可食者二之一。外有萊五十畝也。其家七人。除家長外。可任者半。止三人也。中地。卽再易之地。百畝。可食者半。外有萊百畝也。其家六人。除家長外。可任者半。則二家五人也。下地。三易之地。百畝。可食者三之一。外有萊二百畝也。其家五人。除家長外。可任者半。則二人也。鄭解俱未達。

○按此節之文說者疑不當屬司馬欲移之司徒司空不知是書以司馬掌征伐守四方諸侯土地軍賦皆得而制之故獨詳非錯簡也然據其說亦大謬自禹功平成九州之地畫爲五服東西南北不過五千里今九畿踰萬里豈周地卒然改闢倍于唐虞乎四海非縮于古也東南半壁千餘里而阻大海北至燕郊千餘里而逼沙漠惟西南稍遠然皆秦漢以來開拓周未嘗通中國安得八方環遶萬里均齊稱爲九畿乎周京僻處西隅據此則豐鎬正當采衛蠻夷間何得稱國畿詩書惟王國稱畿今以九服之地皆謂

畿名亦未稱

中

去聲

春教振旅司馬以旗致民平列陳

陣

如戰之陳辨

鼓鐸錫

錫

錫

錫

之用王執路鼓諸侯執賁鼓軍將執晉

鼓師帥執提旅帥執鞀

皮

卒長執鏡兩司馬執鐸公司

馬執錫以教坐作進退疾徐疏數之節遂以蒐田有司

表貉誓民鼓遂圍禁火弊獻禽以祭社

兵者守國之備于云以不教民戰是謂棄之故因田

獵教之凡師出曰治兵入曰振旅春田習振旅農功

方作散兵歸田如詩勞還帥還卒皆以春也以旗致

民樹熊虎之旗招集大衆也平齊也布列車徒如臨



敵也。鐸、錫、鏡皆似鐘而大小異。路大也。凡天子所御曰路。鼓人職云：以路鼓。鼓鬼享。以賁鼓。鼓軍事。以晉鼓。鼓金奏。諸侯代王執事。則執賁鼓。將戰。金鼓交作。則擊晉鼓。軍之進退係于將。故軍將執之。馬上曰提鼓。二千五百人之師帥執之。絡于項下曰鞀鼓。五百人之旅帥執之。如鈴而無舌曰鏡。軍法鼓退鳴鏡。百人之卒長執之。大鈴金舌曰鐸。鐸以通鼓。二十五人之兩司馬執之。如小鐘而節鼓者曰錫。五人之長公。司馬執之。此所謂辨鼓。鐸、錫、鏡之用也。凡兵以鼓進。以鏡退。鼓急則行疾。緩則行遲。遠則疏。近則數。皆所

教之節也。春田曰蒐。蒐，搜也。農事方作，蒐捕禽獸之  
伏于田間者曰蒐。蒐，有司大司馬之屬。表貉，立表貉祭  
貉。禡，通祭。始爲兵，蚩尤也。誓，民戒勿犯令也。鼓，旣誓  
伐，鼓衆聞鼓進圍其所禁山澤。逐禽也。火，弊火止也。  
春田主火爲焚萊除陳草也。蒐，畢火止。虞人植表使  
各獻所獲之禽于下。方春后土發生，故祭先社。春田  
必以社日。

中夏教芟舍。如振旅之陳。羣吏換車徒。讀書契。辨號名  
之用。帥以門名。縣鄙各以其名。家以號名。鄉以州名。野  
以邑名。百官各象其事。以辨軍之夜事。其他皆如振旅。

遂以苗田如蒐之灋車弊獻禽以享酌

爰舍草止也軍行有草止之法營壘于野所戒在夜  
因夏田教之夏禾成苗野鼠害苗取猫捕鼠之義以  
名獵教夜事也撰選通簡擇也讀書契按籍校選也  
辨名號將帥至伍長各以徽識名號辨之門名各帥  
所居門名古卿大夫治第各因其所居國門爲名如  
魯東門襄仲宋桐門右師之類在軍中卽以門名之  
使其屬識之也縣鄙縣正鄙師至鄰長也家食采之  
家鄉謂州長至比長野謂六遂之衆邑謂稍甸公邑  
大夫也百官從王護衛者事謂各執事草舍夜火也有

警則易辨識。部曲不亂也。其他如春蒐振旅，坐作進退，表貉誓衆，同也。車弊，車止也。夏田，主車。車行遲殺少，獵畢則車止。宗廟之祭，夏曰禘，禘約也。夏田取獸不多，故名。鄭謂陰陽始起，象神在內，鑿也。

按四時之祭，皆在孟月。田獵皆在四仲。云以禘以烝，亦相矛盾。疏謂非正祭，未然。

中秋教治兵。如振旅之陳，辨旗物之用。王載大常，諸侯載旂，軍吏載旗，師都載旛，鄉遂載物，郊野載旐，百官載旟。各書其事，與其號焉。其他皆如振旅。遂以獮仙上田。如蒐田之灋，羅弊致禽，以祀祊。方

治兵。謂出師。禮春夏不興師。于秋教之。順殺氣也。旗物。大常以下。解見春官司常職。軍吏。天子六軍之吏。卽大司馬師都。卽公孤爲鄉老者。鄉遂。謂鄉遂大夫。士。郊野郊外六遂縣鄙之衆。百官。王近臣。分帥護衛者。以上諸臣皆有將領之事。鄭云。或將或不將。非也。旗上各書其執事。與其名號。如教芟舍夜事之法。鄭云。書作畫。非也。獮。殺也。秋田曰獮。以應殺氣。羅。網也。秋田多穀。主網羅。王制云。鳩化爲鷹。則設罝羅。秋祭四方。報成物。祊。方也。詩云。以社以方。

中冬。教大閱。前期羣吏戒衆庶。脩戰灋。虞人萊所田之。

野爲表百步則一爲三表又五十步爲一表田之日司馬建旗于後表之中羣吏以旗物鼓鐸鐃各帥其民而致質明弊旗誅後至者乃陳車徒如戰之陳皆坐羣吏聽誓于陳前斬牲以左右徇陳曰不用命者斬之中軍以鼙令鼓鼓人皆三鼓司馬振鐸羣吏作旗車徒皆作鼓行鳴鐃車徒皆行及表乃止三鼓摠六鐸羣吏弊旗車徒皆坐又三鼓振鐸作旗車徒皆作鼓進鳴鐃車驟徒趨及表乃止坐作如初乃鼓車馳徒走及表乃止鼓戒三闕車三發徒三刺乃鼓退鳴鐃且卻及表乃止坐作如初

仲冬農暇乃教大閱特詳于三時羣吏鄉師以下萊  
除草萊便馳驅也表植木表正行列自南而北連植  
四表表百步三表則三百步又五十步一表共三百  
五十步左右之廣各容三軍鄉師州長以下各帥其  
所統之民而致之大司馬質明天正明卽田日之日  
弊仆其所建旗後至者誅始陳衆卒皆跪聽誓大司  
馬爲軍吏立北表下南面誓衆羣吏皆北面向表聽  
誓訖各歸部伍中軍軍將居軍之中擊鼙以令鼓鼓  
人謂中軍及師帥旅帥執鼓者三鼓鼓三度司馬兩  
司馬振鐸以作衆也作旗豎旗也車徒皆作坐者皆

起也。既起，鼓人鼓之使行。伍長鳴錫節之南行。及第二表止，復次三鼓。兩司馬手捫其鐸，振之使不成響。以示暫息。旗皆偃，衆皆坐。次又三鼓，振鐸立旗。衆皆起，鼓行。鳴錫，車乃急驟。徒乃疾趨。視初加勇。南行。及第三表止，擁鐸偃旗。衆坐如初。次又三鼓，振鐸立旗。衆皆起，鼓進。鳴鐸，車乃馳驅。徒乃奔走。南追。及第四表乃止。鼓戒，戒窮逐也。車發，迴車也。刺，殺敵也。每鼓一闕，則車一轉。徒一刺。象克敵而還。乃鼓退。軍吏與士卒皆迴身北向。卒長鳴鐃和鼓。軍皆卻退。自前表至後表，坐作之禮。與初同。鄭云：習戰之禮。出入同所。



異者廢錫而鳴鏡耳

遂以符田以旌爲左右和之門羣吏各帥其車徒以敘和出左右陳車徒有司平之旗居卒間以分地前後有屯百步有司巡其前後險野人爲主易野車爲主旣陳乃設驅逆之車有司表貉于陳前中軍以鞶令鼓鼓人皆三鼓羣司馬振鐸車徒皆作遂鼓行徒銜枚而進大獸公之小禽私之獲者取左耳及所弊鼓皆駮亥車徒皆譟徒乃弊致禽饁獸于郊入獻禽以享烝

冬禽伏藏守而取之曰狩軍門曰和師克在和也兩旌夾立爲門左右爲兩門車徒各以敘出和門左出

列左右出列右有司謂各帥居門均其左右百人爲卒每卒旗居中間百人屯其下各有分地前後謂所分車徒前後司馬法兵車一乘甲士三人步卒七十二人車徒同羣臨陣則車徒異羣險野人前平野車前前後後相去百步各帥長巡行其間山田曰險澤田曰易爲主卽居前也行陳旣定乃設驅逆之車立表祭貉中軍以下皆狩田之法枚如箸銜于口以繩結項後止語也大獸難制則公搏之小獸則獨力可制也凡獲獸割取左耳如殺敵之獻馘弊止也及所弊至所當止之地賊疾擊鼓也諫羣呼象克敵大獲也

徒乃幣田止也。致禽虞人植表收所獲禽。衆歸至郊。以所獲禽獻四方之神。入則獻于廟。冬祭曰烝。凡言獻禽及用火用車用羅旗鼓行陣之類。四時各舉一互備也。

按兵者。殺人之事。聖人。不欲以瀆民。而因獵獸習其事。又不欲無故殺獸。因四時。天神人鬼之享。乃田。又不欲殺無罪之獸。因其害田。取之禽獸。且然。況肯毒其民乎。作者未必能行此意。而古聖人。因田講武之義可知也。

及師。大合軍以行禁令。以救無辜。伐有罪。若大師則掌

其戒令。蒞大卜。帥執事蒞釁主。及軍器。及致建。大常。比軍衆。誅後至者。及戰。巡陳。眡事。而賞罰。若師有功。則左執律。右秉鉞。以先愷樂。獻于社。若師不功。則厭業而奉主車。王弔勞士。庶子則相。大役與慮事。屬其植。受其要。以待攷。而賞誅。大會同。則帥士。庶子而掌其政令。若大射。則合諸侯之六耦。大祭祀饗食。羞牲魚。授其祭。大喪。平士大夫喪。祭奉詔馬牲。

及師。謂有事出師。大合軍。司馬自將聚衆也。允伐曰。禁九法曰。令。大師。王自將。戒令。謂軍法。大卜。大事卜。吉凶。釁主。軍出奉廟主。社主。行殺牲血塗主。及軍器。

致召集六師。天子自將。大司馬用王之太常。致衆弊而誅後至者。及戰巡視功罪。行賞罰。律以銅鑄爲簞。如小鍾。春官大師執同律以和軍聲。師克則大司馬執之以先愷樂也。厭冠不起。貌曲禮云。厭冠不入公門。喪服之冠也。兵敗用喪禮。主車載社主廟主之車。士庶子。謂卿大夫子。死于軍者。王弔勞之。庶子。卽諸子。未爵稱士。相相禮。大役築城之類。慮事謀爲也。植植榦以束版。屬聚衆也。要簿書稽功者。王大會同。庶子護衛。則大司馬帥之大射。王與諸侯射。王射設三侯。合諸侯爲六耦。羞進也。牲魚以魚爲牲。鱗甲之象。

故大司馬薦之授祭舉肺以授尸賓祭于豆間平士大夫齊其服比其職與位也司馬平邦國故掌之王喪祭用馬牲大司馬奉以告于柩鄭云遺奠也

小司馬之職掌凡小祭祀會同饗射師田喪紀掌其事如大司馬之灋

小司馬職見上職掌以下有關文

軍司馬

職見上事闕

輿司馬

職見上事闕

行司馬

職見上事闕

司勳上士二人下士四人府二人史四人胥二人徒二十人

主賞功軍事賞爲先故司勳首衆職或欲移之天官非也

司勳掌六鄉賞地之灋以等其功王功曰勳國功曰功民功曰庸事功曰勞治功曰力戰功曰多凡有功者銘書於王之太常祭於大烝司勳詔之大功司勳藏其貳掌賞地之政令凡賞無常輕重眡功凡頒賞地參之一

食唯加田無國正

賞地卽司徒載師職所謂賞田也古者賞功以地王  
功功在王躬國功在社稷民功在庶民事功作事有  
功治功服官有功戰功臨陣有功書於王之旂與日  
月同明示表章也死則從于宗廟烝而司勳告其神  
貳副也功書於天府司勳藏其副參之一食一無征  
二猶征也唯特加恩賜之田全無征正征通稅也  
馬質中士二人府一人史二人賈四人徒八人

戰用莫如馬質正也掌平馬價與用馬之法馬房星  
之精與火同宮盛于夏故馬質先夏



馬質掌質馬馬量三物一曰戎馬二曰田馬三曰駑馬  
皆有物賈綱惡馬凡受馬於有司者書其齒毛與其賈  
馬死則旬之內更旬之外入馬耳以其物更其外否馬  
及行則以任齊其行若有馬訟則聽之禁原蠶者

量度也物材力也上材爲戎馬次用田獵駑馬下供  
冗用物賈謂毛色與價值綱惡馬馬蹄齧者綱維之  
使馴服也受馬于有司謂有公事乘官馬者記其所  
受馬老少與價值遇馬死十日內告更更代也道里  
近旬日內可省驗也十日外不及省驗割其死馬之  
耳來驗毛色實與更凡更馬不過二旬過二旬外告

亦不與更及行。謂馬始行。試其力之強弱。爲任之輕重。均齊其行。勿使中道疲乏也。歲再蠶。曰原蠶。原。再也。猶易原筮之原。蠶爲龍星之精。故周頌靈星尸繇衣馬。亦龍精。與蠶同氣。再蠶則夏矣。夏午火爲馬。蠶盛傷馬。故夏官之屬司其禁。

量人下士二人。府一人。史四人。徒八人。

量。謂以丈尺度地。量人掌營軍壘。習知天下九州山川道里之數。大軍所向。識敵形。此行師之要。故屬司馬。說者移以補司空。非也。

量人掌建國之灋。以分國爲九州。營國城郭。營后宮。量

市朝道巷門渠造都邑亦如之營軍之壘舍量其市朝  
州涂軍社之所里邦國之地與天下之涂數皆書而藏  
之凡祭祀饗賓制其從獻脯燔之數量掌喪祭奠窆  
反之俎實凡宰祭與鬱人受學歷而皆飲之

分國爲九州分天下之國按禹蹟九州之舊宇內大  
勢可知也營國營王國后宮六宮市朝道巷門渠六  
者皆謂王國量謂廣狹大小皆有定式造都邑謂封  
建諸侯軍壁曰壘大軍所舍倣國都爲營亦有市有  
朝有州有涂有軍社之里二千五百人爲師猶二千  
五百家爲州也涂道路軍社社主在軍中者里猶居

也。凡天下邦國之地，與道途遠近之數，皆書而藏之，以熟知其形勢。祭祀以下，量人平居在官之事，從獻從酒，以獻脯臠，卽所獻多少，曰數。長短曰量。儀禮脯長尺二寸，喪祭謂虞祭，奠窆謂穿墳，釋奠于土神，春官冢人甫窆，遂爲之尸。是窆日有祭，而量人掌其俎之實，宰祭，大宰佐王祭，或攝祭，畢酒器，嘏通受畢，猶受嘏尸酢，主人以福酒，鬻人制酒，量人制穀亦受酢。歷次第也，皆飲謂盡飲，猶言卒爵。

按司馬有量人，掌書天下邦國道里遠近及大軍壘舍所里，而兼掌建國之法者。平居知市朝門渠之制。

則在軍知營壘舍。平居習九州邦國之涂數。則軍興  
熟其道里。是以無事惟祭饗。膳肉之制。有事則敵情  
萬里不越俎豆。是書所爲寄軍。今于內政之意。世儒  
以類求之。或曰司空。或曰司徒。失其解矣。

小子。下士二人。史一人。徒八人。

主軍中斬狗之事。而寄之屠人。小子。羊也。小羊曰達。  
詩曰。先生如達。南方火獸。未爲羊。故屬夏。

小子。掌祭祀。煮羊。肆羊。殺肉。豆而掌珥于社稷。祈于五  
祀。凡沈辜。侯禳。飾其牲。繫邦器及軍器。凡師田。斬牲。以  
左右狗。陳祭祀。贊羞。受徹。馬。

羞進也肆豚解也國語云禘郊之事則有全烝宗廟不全烝豚解而腥之曰肆體解而爛之曰穀肉豆切熟肉爲豆珥割牲耳以薦鬯禮也祭川曰沈磔禳曰辜迎祥曰侯除菑曰禳飾其牲謂刷條之邦器禮樂之器軍器旗鼓之屬皆殺牲鬯之鬯歆也以歆其神彌其鬯受徹祭畢徹俎豆小子受之

羊人下士二人史一人賁二人徒八人

主祭祀割羊屬司馬者軍行則帥之以爲小子之屬羊屬未爲火五行傳視之不明則有羊禍視爲火故屬夏官賁二人賁羊者

羊人掌羊牲。凡祭祀飾羔。祭祀割羊牲登其首。凡祈珥共其羊牲。賓客共其灋羊。凡沈辜侯禴。釁積共其羊牲。若牧人無牲則受布于司馬。使其賈買牲而共之。

登其首謂尸入室薦牲首。郊特牲云用牲于庭升首于室灋羊。殽饗牢禮之羊。多少有常法。如上公殽五牢。饗餼九牢之類。積積于柴上焚燎之羊受布受泉也。

司燿

賈

下士二人徒六人

燿火明也。與觀通。書盤庚云予若觀火。視屬火。故謂火爲燿。軍中有火攻之法。故屬司馬。平居無事則掌

火政南方火。故屬夏。說者欲移屬春官，非也。春官有司烜，專爲祭祀耳。

司烜掌行火之政令。四時變國火，以救時疾。季春出火，民咸從之。季秋內火，民亦如之。時則施火令。凡祭祀則祭燿。凡國失火，野焚萊，則有刑罰焉。

行火猶用火。國火民間日用之火。變謂改火。論語云：鑽燧改火。取各方色木鑽火。順時氣以救時疾。火新則無疾。季春夏正三月建辰。火星心星。卽大辰。三月昏見于南方。火用事使民出火。如陶鑄之類。季秋夏正九月建戌。日繼大火。火星伏藏。使民斂火防焚也。



時謂如季春以後季秋以前及四時當出火用火之時皆司燿令之祭燿祭始教燧者失火民間被焚者焚萊縱火野燒者

按羊人燿人之類無甚切務特以其爲夏令湊入備軍伍之用說者謂天之水旱災祥人之疾病壽夭皆生于火然則雖司燿用何道以救之皆未窺作者之意而過爲從災也夏秋二官此類甚多

掌固上士二人下士八人府二人史四人胥四人徒四  
十人

掌防守之事

掌固掌脩城郭溝池樹渠之固。頒其士庶子及其衆庶之守。設其飾器。分其財用。均其稍食。任其萬民用其材器。凡守者受灋焉。以通守政。有移甲與其役財用。唯是得通與國。有司帥之以贊其不足者。晝三巡之夜亦如之。夜三鑿。威以號戒。若造都邑則治其固。與其守灋。凡國都之竟有溝樹之固。郊亦如之。民皆有職焉。若有山川則因之。

城郭謂王城外有郭。城郭外有溝池。溝池上樹木。渠卽溝池。士庶子。公卿大夫子。衆庶衆民。公卿大夫子衛護王宮。有急與庶民分地而守。設飾器守城之器。

陳設脩飾也。財用守禦所用之財。稍食廩祿也。任萬  
民用材器。興工濬築之類。用人與器。濶防守之法。通  
守政。彼此相應援也。移甲以下。通守政之事。兵甲人  
役資財。唯此處有餘。可以通彼者。則移之以助不足。  
國有司主甲兵。與人役財用之司。晝夜三巡察懈惰  
也。警警夜之鼓。號戒號呼士卒。使戒備。此以上皆守  
王城也。造都邑。造三等采邑。治固治城池。守濶。即前  
法。國都之竟。王國及三等都邑之界。郊謂王城外。遠  
近郊關。民皆有職。分番輪守。有山川可依。則因其險  
守之。

司險中士二人下士四人史二人徒四十人

險謂四方阨塞要害之地所當防據者在國曰固在野曰險

司險掌九州之圖以周知其山林川澤之阻而達其道路設國之五溝五涂而樹之林以爲阻固皆有守禁而達其道路國有故則藩塞阻路而止行者以其屬守之唯有節者達之

達其道路謂山林阻則開鑿之川澤阻則橋梁之五溝卽遂人之遂溝洫澮川五涂卽徑畛涂道路樹之林作藩落也國有故兵變也止行者防姦寇也

掌疆中士八人史四人胥十有六人徒百有六十人  
掌正四方疆界

掌疆

事闕

候人上士六人下士十有二人史六人徒百有二十人  
掌巡視道路軍中用以爲斥候傳警無事則主迎送  
六人六鄉各一人

候人各掌其方之道治與其禁令以設候人若有方治  
則帥而致于朝及歸送之于竟

一方遠方道治經行便道者爲治其防護之事分鄉治

事曰各掌設候人設其徒爲伺候之人方治遠方有  
事來王國求治如虞芮質成之類

環人下士六人史二人徒十有二人

往復曰環鄭作郤非也往探敵情還復蓋勇士如今  
探子

環人掌致師察軍慝環四方之故巡邦國搏謀謀賊訟  
敵國揚軍旅降圍邑

致師謂臨敵挑戰察敵慝敵有隱伏往伺察四方有  
故還報敵人來窺探搏執之敵國侵陵往辯之兩軍  
交壘耀武以揚之圍其國邑賈勇以降下之數者皆

勇士之事

挈結壺氏下士六人史二人徒十有二人

挈猶提也。壺汲水器。軍中主刻漏。大軍所止。遇水可汲。懸壺示衆故名。

挈壺氏掌挈壺以令軍井。挈轡以令舍。挈本畚以令糧。凡軍事。縣壺以序聚櫟。凡喪。縣壺以代哭者。皆以水火守之。分以日夜。及冬則以火爨鼎水而沸之。而沃之。

軍行。凡有事。令衆懸物示之。穿井既成。懸壺示衆。令汲。轡馬韉解轡欲宿。懸轡示衆止舍。畚箕也以盛糧。懸畚使知頒糧。軍中置刻漏。定時。畫竹箭爲百刻。以

壺盛水懸箭上水漏下入器中沒箭以驗刻數也檣  
柝通夜行以兩木相擊人衆曰聚軍中擊柝巡夜以  
序按刻更代凡喪未殯以前哭不絕聲使人代哭亦  
以漏爲序水守壺以沃漏也火守壺以視箭也分以  
日夜分冬夏日夜之長短冬水凍漏不下以火炊水  
沸而後灌

射人下大夫二人上士四人下士八人府二人史四人  
胥二人徒二十人

射武備自當屬司馬或者欲移之宗伯非也射人屬  
宗伯則服不射鳥將鳥屬次第分明無錯簡



射人掌國之三公孤卿大夫之位三公北面孤東面卿大夫西面其摯三公執璧孤執皮帛卿執羔大夫鴈諸侯在朝則皆北面詔相其灋若有國事則掌其戒令詔相其事掌其治達

射人本掌射兼掌朝列之位以射則有位次也王與賓燕射在路門外朝故射人兼司朝位三公北面答君也孤卿大夫東西面佐佑王也灋禮法國事助祭之事戒令告以齊與祭期相其事相在廟祭事治達諸侯既治其事達于王王有命又受而達之此節皆言朝見之事既朝見而後燕與之射

按鄭謂射人所掌位爲將射入見君之位將射見則不必擊凡擊始相見也始見輒與燕而射非也

以射灋治射儀王以六耦射三侯三獲三容樂以騶虞九節五正諸侯以四耦射二侯二獲二容樂以狸首七節三正孤卿大夫以三耦射一侯一獲一容樂以采蘋五節二正士以三耦射豢侯一獲一容樂以采芣五節二正若王大射則以狸步張三侯王射則令去侯立于後以矢行告卒令取矢祭侯則爲位與大史數射中佐司馬治射正祭祀則贊射牲相孤卿大夫之灋儀

灋卽耦獲容樂之法儀卽一三五二七之儀兩人爲

耦六耦凡十二人兩耦共射一侯故用三侯三侯二  
侯連張自北而南詳大射禮天官司裘云王大射三  
侯虎熊豹諸侯二侯無虎大夫一侯麋也獲者三人  
持旌侯道旁報中卽服不氏也容一名乏皮爲之獲  
者所自隱蔽曰容矢至此而乏又曰乏騶虞狸首采  
繁皆樂章解見春官樂師歌一閒爲一節九節以五  
聽以四射七五倣此正鵠心侯中曰鵠鵠中曰正卽  
鄉射記云天子白鵠諸侯赤鵠也五正以白色畫鵠  
中爲五處三正二正一正倣此天子諸侯侯道遠難  
中正多大夫以下侯道近易中正少王大射王與諸

侯大夫士射狸猫屬善搏物步必擬度發無不獲故  
量侯道之步曰狸步侯有大小則步有遠近九節者  
九十弓七節者七十弓五節者五十弓詳天官司裘  
令去侯謂獲者執旌負侯將射射人令去居乏避矢  
也立于後射人立王後視矢行高下左右告王也卒  
射畢也令取矢令射鳥氏取既射之矢祭侯服不氏  
祭也王射則服不氏爲獲者負侯王獻服不服不以  
祭侯犬史春官大史掌射事節中舍筭射畢射人與  
大史數中之多寡射正猶射政司馬主之射人佐之  
射牲王祭自射殺犧牲國語云郊禘之事天子自射

其牲司弓職亦云其王射牲之弓矢是也相孤卿大夫之灋儀相其與天子射于朝也

按儀禮大射諸侯亦張三侯是侯用天子而以三耦射耦用卿大夫與此異鄉射記云唯君有射于國中其餘否鄭註人臣不習武事于君側是也然不于國中則當于野據此文臣有射于朝者矣春官司服云中射用鷩冕是又有射于廟者矣廟朝可射國中獨不可乎鄉射樂奏騶虞今云王以騶虞祭禮先夕省牲祭之晨君迎牲入告殺于庭今云祭祀射牲然則射于先夕乎射于庭乎于門外乎豈射而遂斃之乎抑

射而後殺之乎。于事理皆未見確

會同朝覲作大夫介。凡有爵者大師令有爵者乘王之倅車。有大賓客則作卿大夫從。戒大史及大夫介。大喪與僕人遷尸作卿大夫掌事。比其廬不敬者苛罰之。

會同朝覲諸侯來王也。作使也。介副使。王有事于諸侯則公卿爲正使。大夫爲介。凡有爵謂上中下士可爲衆介者。使之副大夫也。大師謂王出征王之倅車。卽春官車僕所掌五戎之副車也。王乘一路衆戎路皆從。令有爵者乘之亦謂士以上也。賓客謂諸侯王見諸侯則選卿大夫從。王春官大史主協禮事。執書

詔王故射人戒大史也。如王有命賜賓客于館使公卿則大夫爲介亦射人戒也。王崩射人與大僕遷尸始死北墉遷南牖下。小斂遷于房斂訖遷于堂。大斂遷于阼階斂訖遷于西階殯皆射人與大僕也。僕人大僕之人掌事掌喪事比其廬比當居倚廬者如天官宮正辨親疎貴賤之居親貴者居倚廬疎賤者居聖室不敬居喪不敬苛罰細數其事責罰之也。

服不氏下士一人徒四人

善射以服不服者射義云射者射爲諸侯其詩云小大莫處御于君所考工記梓人祭侯之辭云毋或若

女不寧侯不屬于王所故抗而射女卽服不之義  
掌養猛獸者平居無事云爾

服不氏掌養猛獸而教擾之凡祭祀共猛獸賓客之事  
則抗皮射則贊張侯以旌居乏而待獲

猛獸虎豹熊羆之屬抗皮王受賓客朝貢之皮幣服  
不氏舉之以旌居乏中待射者矢中舉旌唱獲也

射鳥氏下士一人徒四人

服不氏力能服猛者射鳥氏巧能中微者鳥亦夏火  
之象

射鳥氏掌射鳥祭祀以弓矢毆鳥鳶凡賓客會同軍旅



亦如之射則取矢矢在侯高則以并夾取之

鳥鳧鴈之屬以供膳羞鳥鳶惡鳥喜集人屋善鈔盜遺汙穢大事貴清肅故毆之侯高侯之高上手不及以并夾取之并夾取矢之具

羅氏下士一人徒八人

羅網也以網鳥郊特牲曰大羅氏天子之掌鳥獸者諸侯貢屬焉其致戒于諸侯曰好田者亡其國蓋田獵之官故屬司馬網罟本南離之象

羅氏掌羅鳥鳥蜡則作羅襦中春羅春鳥獻鳩以養國老行羽物

鳥鴉鳥飛集成羣可羅取蜡歲終祭百物之神蜡則百蟲蟄豺祭獸宜羅禽羅網也襦裙屬羅襦網方幅似襦與三百異春鳥鳥蟄初出者鳩亦春鳥仲春鷹始化爲鳩變舊爲新宜以養老行羽物謂頒賜羽物掌畜下士二人史二人胥二人徒二十人

掌養鳥

掌畜掌養鳥而阜蕃教擾之祭祀共卵鳥歲時貢鳥物共膳獻之鳥

阜蕃鷩鷩之類教擾鸚鵡之類卵鳥鳥子貢鳥物貢四時野鳥膳獻王及賓客之饌

按服不如後世搏虎之類射鳥如穿楊貫虱之類皆  
大司馬之材官也羅氏掌畜因鳥附之鳥南方之宿  
宜屬夏本無錯簡但一鳥耳羅之養之各置官屬不  
已亢乎

周禮完解卷八

郝敬習

夏官司馬下

司士下大夫二人中士六人下士十有二人府二人史四人胥四人徒四十人

古學士之進仕者通謂之士教無二術文武同途故士皆掌之司馬王制云鄉論秀士升之司徒司徒論選士升之國學大司樂論造士升之司馬司馬論進士之賢材者告于王而官之任官而後爵之位定而後祿之皆大司馬事世儒拘天官八柄爵祿之說移

司士屬天官不知天官之事皆衰職也六典八灋八則八柄六卿之任無所不兼而不親執財賦則司徒禮樂則宗伯用材則司馬刑法則司寇考工則司空而冢宰無偏任所以象天也自後世文武二途士習章句者屬宗伯諳鞞鈴者屬司馬文武有左右而士習始偷是書其猶古之遺意與

司士掌羣臣之版以治其政令歲登下其損益之數辨其年歲與其貴賤周知邦國都家縣鄙之數卿大夫士庶子之數以詔王治以德詔爵以功詔祿以能詔事以

又奠食唯賜無常

羣臣之版內外大小羣臣版籍政令卽登下損益之政令新進者登記之謂益退去者除下之謂損年歲仕者之老幼曲禮四十始仕五十服官政七十致仕故須辨邦國仕于諸侯者都家縣鄙仕于三等采邑者卿大夫士庶子護衛王宮者奠食定祿之多寡祿以日月計久而後奠王制云位定而後祿祿有常數貴賤爲準唯王賞賜無常數

正朝儀之位辨其貴賤之等王南鄉三公北面東上孤東面北上卿大夫西面北上王族故士虎士在路門之右南面東上大僕大右大僕從者在路門之左南面西

上。司士擯孤。卿持揖。大夫以其等旅揖。士旁三揖。王還揖。門左。揖門右。大僕前。王入內朝。皆退。

朝儀之位。每日視朝之位。王之中朝。在路門外三公北。面答王也。東上。以東爲班首。孤立西。東向。卿大夫立東西向。皆以北爲上。自北立而南也。王族同姓之臣護衛者。故士。舊爲士。年久宿衛曰。故虎士。卽虎賁。立路門右。負門南向。大僕大右。皆司馬之屬。大右卽司右。從者其屬也。立路門左。亦負門南向。右東上。左西上。王出入由中也。司士爲擯。王出朝。司士詔王揖。兩手推而前曰。揖。示辭讓也。特揖。三孤六卿。人各一。

揖大夫有中下各以其等同衆一揖旅衆也士立大夫後旁三揖上中下士亦以其等旅揖也王還旋身向內左揖大僕大右右揖王族虎士亦旅揖也揖畢大僕前正王位王卽席也視朝畢王入路門內路寢之前廷曰內朝以聽政孤卿以下皆退各適館治事以奏

按位次之禮莫嚴于朝廷與軍伍故司馬之屬兼掌朝儀之位朝政與軍伍皆陳列之事禮樂征伐俎豆軍旅文武同道之意夏火文明禮事多屬夏

掌國中之士治凡其戒令掌擯士者膳其饗凡祭祀掌



士之戒令。詔相其灋事。及賜爵。呼昭穆而進之。帥其屬而割牲。羞俎豆。凡會同。作士從賓客。亦如之。作士適四方。使爲介。大喪。作士掌事。作六軍之士。執披。凡士之有守者。令哭無去守。國有故。則致士而頒其守。凡邦國三歲。則稽士任。而進退其爵祿。

國中。王國中。士治。仕者之治。蹟擯士。凡仕者初就職。見王。則司士爲擯相。摯。謂見者所執羔鴈之類。受之以付膳人。供王膳。祭祀之戒令。如齋與祭期之類。灋事。在廟行禮之法事。賜爵。祭終旅酬。呼同姓長幼。依昭穆次第。進使受爵也。割牲。宗廟無全烝。始則豚解。

而腥之爲七體次則體解而燭之爲二十一體王會同則使士從王作猶使也賓客謂饗食適四方王命使適介副使披柩旁有紐使人持之防道路披靡曰披于六軍中使千人行也有守有官守者令吳于守所不得離職有故有兵寇致召也邦國諸侯之臣三歲稽考其功罪而進退之

按是書王國仕者三年大比其權在冢宰邦國之仕者三年大比其權在司馬

諸子下大夫二人中士四人府二人史二人胥二人徒二十人

掌公卿大夫之子，非一人曰諸子，與燕儀，所謂庶子。異庶子未爵，而此爵大夫也。

諸子，掌國子之倅，掌其戒令，與其教治，辨其等，正其位。國有大事，則帥國子而致於大子，唯所用之。若有兵甲之事，則授之車甲，合其卒伍，置其有司，以軍灋治之。司馬弗正，凡國正弗及，大祭祀，正六牲之體，凡樂事，正舞位，授舞器，大喪，正羣子之服位，會同賓客，作羣子從，凡國之政事，國子存遊倅，使之脩德學道，春合諸學，秋合諸射，以攷其藝而進退之。

國子，謂公卿大夫之子，在國學者，倅，副貳也。古者世

官子貳父曰倅戒令卽致于太子以下諸事教治卽  
脩德學道等位各依其父蔭等級爲位大事喪祭之  
類司馬弗正謂司馬不得征役凡國正謂司徒鄉遂  
力役之征亦不及也正牲體出鼎肉陳之俎也舞位  
六十四人之行列舞器羽籥干戚之類舞用國子故  
諸子爲正之授之喪服王喪卿大夫子斬衰與父同  
雜記云大夫之子得行大夫禮故也位哭泣之位作  
羣子從使羣子護從王也國之政事繇役之事存雷  
也免役不往也遊倅倅未仕無官守也合聚也學國  
學射射宮卽序也免其役以使之學

司右，上士二人，下士四人，府四人，史四人，胥八人，徒八十人。

掌勇士可爲車右者，戎事尚右，故勇士稱右。

按是職專掌勇士，鄭謂兼掌戎右，齊右道右非也。戎右齊右，爵皆下大夫，有材勇爲王驂乘者，大夫非士所屬。

司右掌羣右之政令，凡軍旅會同，合其車之卒伍，而比其乘屬其右，凡國之勇力之士，能用五兵者，屬焉。掌其政令。

羣右，謂凡車右勇力之士，車之卒伍，謂凡車三三爲

小偏三五爲偏五五爲大偏是一師二千五百人之車也二偏爲卒又謂廣是合二師之車也五偏爲伍凡一百二十五乘是萬二千五百人之車也合之使相騾屬比其乘較馬力強弱也屬其右分付車右勇力之士五兵弓矢戈矛戈戟五者長短相資考工記五兵戈戟酋矛夷矛也

虎賁奔氏下大夫二人中士十有二人府二人史八人胥八十人虎士八百人

掌王護衛之士賁奔通勇而善走者

虎賁氏掌先後王而趨以卒伍軍旅會同亦如之舍則

守王闕。王在國則守王宮，國有大故則守王門。大喪亦如之。及葬，從遣車而哭，適四方使，則從士大夫。若道路不通，有徵事則奉書，以使於四方。

先後王謂王出入則先後護從，趨以卒伍，謂行有行列。王行宮曰舍，闕，楹，極，大故，兵寇，王門，王五門，遣車送葬之車，從士大夫，從使臣也。

旅賁氏中士二人，下士十有六人，史二人，徒八人。旅行旅賁見前，掌勇士護從王車者。

旅賁氏掌執戈盾，夾王車而趨。左八人，右八人，車止則持輪。凡祭祀會同賓客，則服而趨。喪紀則衰葛執戈。

軍旅則介而趨

服而趨謂不介冑朝服夾車趨禮既葬易葛此衰以武士尚輕也

節服氏下士八人徒四人

服王袞冕爲王持大常之旗以節制六軍故曰節服言非通服也

節服氏掌祭祀朝覲袞冕六人維王之大常諸侯則四人其服亦如之郊祀袞冕二人執戈送逆尸從車

大常王旗畫日月星辰十二旒長曳地故用六人共牽持諸侯旗則交龍服如之如諸侯服也郊祀天子



大裘而冕，節服二人，亦大裘而冕。尸，象上帝之尸。晉語曰：晉祀夏郊，董伯爲尸，從車從尸車。

按是職本下士，披天子服，執旗荷戈，以趨于禮。何居祀天爲尸，亦不經。

方聲相上聲氏狂夫四人

主逐疫之事，方相猶罔象虛無之稱。

方相氏掌蒙熊皮，黃金四目，玄衣朱裳，執戈揚盾，帥百隸而時難。隸以索室，敗疫，大喪先匱及墓，入壙以戈擊。

四隅，歐方上聲良上聲

以熊皮蒙頭，黃金塗額爲四目，百隸卽秋官司隸所。

掌五隸之屬。雖以逐疫時。雖季春季秋季冬。人室有陰。應帥衆。搜索之。先匱。先柩行。方良。猶。魁。題。國語。水之怪。龍。罔。象。土之怪。夔。罔。兩。

大僕下大夫二人。小臣上士四人。祭僕中士六人。御僕下士十有二人。府二人。史四人。胥二人。徒二十人。

僕侍御之稱。大僕其長也。

大僕掌正王之服位。出入王之大命。掌諸侯之復逆。王胝朝則前正位而退。入亦如之。建路鼓于大寢之門外。而掌其政。以待建。窮者與遽。急令聞鼓聲則速逆。御僕與御庶子。祭祀賓客喪紀。正王之服位。詔。漢儀。贊王牲。

事王出入則自左馭而前驅凡軍旅田役贊王鼓救日月亦如之大喪始崩戒鼓傳達于四方窆亦如之縣喪首服之凜于宮門掌三公孤卿之弔勞王燕飲則相其凜王射則贊弓矢王胝燕朝則正位掌擯相王不胝朝則辭於三公及孤卿

大僕王親近供奉之臣凡王起居出入皆掌之服王禮服位王臨朝之位皆大僕正之大命大事之命復有事白王逆迎受也王出視朝則前導王正王之位而退立于虎門左王入亦前行導王入正其位而退大寢門外卽路門外王中朝也建鼓以爲視朝早晚

之節亦以待有事伸寃者達上通也窮寃在也遽令  
驛卒急報御僕與御庶子皆守鼓之官聞鼓聲則御  
僕庶子將以事來告大僕速出迎受之也御庶子亦  
御僕公卿大夫子爲之下士十二人曰庶子贊王牲  
事贊其殺解匕載之事凡馭者立車中乘者居左勇  
士居右曰參乘王出大僕乘車前驅則不敢用馭人  
居左自馭不參乘擬王也軍旅田役日月食皆王親  
鼓大僕皆以他鼓擊助之喪首服免髮笄總廣狹長  
短之數書縣宮門使衆守也三公孤卿有事弔勞王  
不親行命大僕往燕飲之法謂獻酬與三燕再燕一

燕之數之類。眡燕朝視路寢前廷之朝。

小臣掌王之小命。詔相王之小溲。儀掌三公及孤卿之復逆。正王之燕服位。王之燕出入則前驅。大祭祀朝覲沃盥。小祭祀賓客饗食。賓射掌事。如大僕之灋。掌士大夫之弔勞。凡大事佐大僕。

小臣職見大僕下。小命尋常傳呼之類。小溲儀趨行拱揖之類。燕猶閒也。燕出入閒行也。沃酌水盥將洗爵酌獻先盥手。凡小事小臣掌之。大事佐大僕不敢專也。

祭僕掌受命于王以眡祭祀而警戒祭祀有司糾百官

之戒具。既祭，帥羣有司而反命，以王命勞之，誅其不敬者。大喪，復于小廟。凡祭祀，王之所不與，則賜之禽。都家亦如之。凡祭祀致福者，展而受之。

祭僕職見上。復招魂也。小廟高祖以下之廟，惟始祖稱大廟。王所不與之祭，如同姓諸侯祭先祖之類。都家三等采邑。春官都宗人家宗人掌其祭祀之類。致福，臣祭歸胙于王，展省視也。

御僕掌羣吏之逆。及庶民之復，與其弔勞。大祭祀相盥而登。大喪持翼，掌王之燕令。以序守路鼓。

職見上。羣吏之逆，謂羣吏有事上奏者。庶民之復，謂

民有事白王者弔勞王使弔勞庶民來復者相盥奉  
槃授巾登登肉于俎翼以飾柩持夾輜車也燕令燕  
居使令序守鼓十有二人以次序守寢門外路鼓待  
達窮與遽令也

隸僕下士二人府一人史二人胥四人徒四十人

僕之賤者曰隸供糞除等役僕隸奔走屬司馬

隸僕掌五寢之埽除糞洒之事祭祀脩寢王行洗乘石  
掌蹕宮中之事大喪復于小寢大寢

寢在廟後天子七廟云五寢者鄭云二祧無寢乘石  
登車之石小寢高祖以下之寢大寢大祖廟寢

弁師下士二人工四人史二人徒四人

弁首服無延旒者人首火象冠而成丁支干以南方  
爲丁火故弁屬夏官或移之春官非作者意

弁師掌王之五冕皆玄冕朱裏延紐五采纁十有二就  
皆五采玉十有二玉笄朱紘諸侯之纁旒九就璫民王  
三采其餘如王之事纁旒皆就玉璫玉笄王之皮弁會  
五采玉璫象邸玉笄王之弁絰弁而加環絰諸侯及孤  
卿大夫之冕韋弁皮弁弁絰各以其等爲之而掌其禁  
令

春官司服祭祀六冕此獨言五大裘與袞同冕也鄭



謂大裘冕無旒。臆說也。冕上有版曰延。廣八寸。長尺六寸。上玄。下朱。制延長曰延。紐以固。延鄭謂爲小鼻。綴武上。貫笄者也。纁。藻同。采。絲也。以采。絲。纁。黃。玉。垂。延。前後各十有二旒。每纁。黃。五采。玉亦各十有二玉。每玉間一寸。十二玉。則旒長尺二寸。前後共玉二百八十八也。玉笄。玉爲簪。橫。黃。冕。武。朱。紘。以。朱。組。左。屬。笄。首。下。繞。頤。右。復。上。屬。于。笄。末。諸。侯。兼。公。上。公。以。九。爲。節。九。就。纁。九。旒。璿。美。石。似。玉。三。采。三。色。璿。玉。其。餘。如。王。之。事。謂。玄。朱。延。紐。紘。等。同。也。纁。旒。皆。就。皆。三。采。也。玉瑱。以。繩。懸。玉。于。冕。兩。旁。當。耳。所。謂。充。耳。者。也。王。

不言玉璜互見也。皮弁，王視朝首服。弁縫曰會，以五采絲貫玉飾縫，曰璫，與綦通，結也。象邸，以象齒飾弁頂下底。弁經，王弔服。弁上加小麻經，細如環。韋弁，戎事之服，各以其等。請纁，旂玉璫。侯伯七纁，七玉。子男五纁，五玉。皆三采。孤卿大夫四命者，三纁三玉。三命者，二纁二玉。弁璫亦以此推之可知。

按冕弁纁王之飾，各以命數爲等。則子男之大夫一命者，一旒一玉。弁會一璫，豈成文章。鄭請一命之大夫冕而無旒，韋弁皮弁無結飾。弁經之弁無辟積，皆以臆解。韋弁戎服，亦何必與朝服皮弁同飾。

司甲下大夫二人中士八人府四人史八人胥八人徒八十人

司兵司戈皆其屬

司甲

事闕

司兵中士四人府二人史四人胥二人徒二十人

掌五兵

司兵掌五兵五盾各辨其物與其等以待軍事及授兵從司馬之灋以頒之及其受兵輸亦如之及其用兵亦如之祭祀授舞者兵大喪獻五兵軍事建車之五兵會

同亦如之

五兵見司右五盾干櫓之屬兵以刺敵盾以自蔽五兵則五盾物與等謂所當用之物與大小長短之式從司馬之法謂車騎步卒多寡各有所用之兵依法授之事畢還輸其所授之兵亦依法收之尋常守衛用兵仗亦依法與之祭祀舞者所執兵朱干玉戚之類大喪廬五兵藏之居喪不親兵革之事也

按鄭謂車上五兵有夷矛無弓矢步卒之五兵無夷矛有弓矢詩云不失其馳舍矢如破是射御相依也又云公車千乘二矛重弓是弓矢皆在車也鄭說難

据

司戈盾。下士二人。府一人。史二人。徒四人。

戈似戟而兩刃。柄短。戟三刃而柄長。盾干櫓也。

按六師之衆。用兵與戈盾多。而司兵止四人。司戈盾止二人。徒止二十餘人。烏足以供之。蓋三軍甲兵出自田賦。官所造。祇給王頒賜耳。

司戈盾。掌戈盾之物而頒之。祭祀授旅賁。故士戈盾。授舞者兵。亦如之。軍旅會同。授貳車戈盾。建乘車之戈盾。授旅賁及虎士戈盾。及舍設藩盾。行則斂之。

爰長丈二。無刃。故士見司士貳車。王副車。乘車。王所

乘車軍旅乘輦路會同乘金路旅黃虎士衛王車者  
止宿曰舍以盾爲藩衛

司弓矢下大夫二人中士八人府四人史八人胥八人  
徒八十人

弓矢之用要而廣故大夫司之繕人橐人皆其屬

司弓矢掌六弓四弩八矢之漙辨其名物而掌其守藏  
與其出入中春獻弓弩中秋獻矢箛及其頒之王弓弧  
弓以授射甲革楛質者夾弓庾弓以授射豸侯鳥獸者  
唐弓大弓以授學射者使者勞者其矢箛皆從其弓凡  
弩夾庾利攻守唐大利車戰野戰凡矢在矢絜矢利火

射用諸守城車戰殺矢鏃矢用諸近射田獵矰矢箠矢用諸弋射恒矢庫矢用諸散射天子之弓合九而成規諸侯合七而成規士合三而成規句者謂之弊弓

六弓卽王弧夾庾唐大四弩卽夾庾唐大八矢卽枉絜殺鏃矰箠恒庫名物卽六弓四弩八矢各有名號物色弓矢畏濕宜燥貴正賤欹守藏宜慎頒曰出收曰入弓弩成于陽和之時中春獻之箠以盛矢皮爲之矢箠用于陰肅之時中秋獻之王弧二弓往體寡來體多最強甲革堅甲皮革楛砮通厚木質卽正以此爲質尚力之射故用強弓夾庾二弓往體多來體

寡最弱彘侯射人職云士射彘侯五節五十步近也  
射鳥獸亦宜近用弱弓唐大二弓往來體一強弱均  
故學射者用之出使遠行者用之賞勞有功者用之  
矢箛從弓每弓百矢盛以一箛弩不言王王不御弩  
也不言弧弓弩異制也弩無不動者夾庾小弩發近  
故利攻守唐大大弩發遠故利車戰野戰凡矢兼弓  
弩枉矢流星也火矢似之因以名絜矢亦火矢數矢  
連發曰絜二者皆戰守之具殺矢矢有刃者鏃矢矢  
有金鏃者近射彘侯之類田獵亦近射也矰高也用  
絲繫矢仰射高鳥曰矰第疾貌射鳥曰弋恒矢常用



之矢庫矢短小蓋弩矢也。散射凡禮射學射之類皆是成規成圓也。凡弓體直合多成圓。曲則合少成圓。直者力強。曲者力弱。強者射遠。天子侯道九十弓。遠故弓強。諸侯道七十弓。大夫士侯道五十弓。故弓以文而弱。句鉤同。曲也。弊猶惡也。太曲者爲惡弓。則直者爲良弓矣。

凡祭祀共射牲之弓。矢澤共射。椹質之弓。矢大射。燕射共弓。矢如數。并夾。大喪共明弓。矢。凡師役會同。頒弓。弩各以其物。從授兵甲之儀。田弋充籠。服矢共。贈矢。凡亡矢者弗用。則更。

射牲王祭親射犧牲射人職云祭則贊射牲澤澤宮  
習射處射義云天子將祭先習射于澤澤擇也射以  
擇士椹質見上如數如各耦所用多少之數并夾以  
取矢侯高者見射鳥氏明弓矢明器之弓矢各以其  
物謂天子王珮諸侯唐大夫士夾庾之類從授兵  
甲之儀謂授弓矢依授兵甲之法司兵職凡授兵從  
司馬之法及受輸亦如之皆所謂法也田田獵弋以  
絲繫矢射鳥充猶實也田弋用矢多故曰充籠矢服  
竹曰籠皮曰服矰矢卽弋矢亡矢旣舍之矢更更易  
凡矢旣舍再收用亡失及收不可用乃請更鄭請矢

不用遺亡者責償似誤

繕人上士二人下士四人府一人史二人胥二人徒二十人

繕言善良也攻也繕治弓矢

繕人掌王之用弓弩矢服矰弋扶拾掌詔王射贊王弓矢之事凡乘車充其籠箠載其弓弩既射則斂之無會計

扶以骨爲之著右手大指勾弦一名彊拾以韋爲之裹左臂避弦一名鞬扞斂收藏也無會計王所用弓矢敗壞亡失不在會計內

橐人中士四人。府二人。史四人。胥二人。徒二十人。

橐，稗也。箭幹曰橐。掌弓矢之材，與地官橐人殊。

橐人掌受財于職金，以齋其工。弓六物，爲三等。弩四物，亦如之。矢八物，皆三等。箠亦如之。春獻素，秋獻成，書其等以饗工，乘其事，試其弓弩。以下上其食而誅賞。乃入功于司弓矢及繕人。凡齋財與其出入，皆在橐人，以待會而攷之，亡者闕之。

職，金、秋、官之屬。掌罪人贖金。古訟者使納鉤金束矢，助弓矢之費。故橐人受于職金。齋，資通。弓六物，卽王弧等。各以長短爲上中下三等。弩四物，卽夾、庾、唐、大。

亦各爲三等。服，夫服，長短如矢。獻，素。服始成，胎素成，成功，各書其上中下等，以制其食饗食也。乘，計也。計其工拙，入功以弓弩入于司弓矢者，待頒賜入繕人者，供王用也。齋財，猶資財，謂置造之費出入，謂弓矢斂散會攷考橐人也。弓矢出入，敝壞亡棄者，除之，計其見在者。

戎右中大夫二人，上士二人

立戎車右爲王參乘

戎右，掌戎車之兵革使，詔贊王鼓，傳王命于陳中，會同充革車，盟則以玉敦。對辟盟，遂役之，贊牛耳，桃，蒟。

戎右與王同車執戈盾立車右備非常供王兵革之役使王親帥六軍則執鼓而戎右告王鼓且助王王會同乘金路革車從則戎右充乘充實左也乘車者居左曲禮祥車曠左乘君車不敢曠左故戎右充之王與諸侯盟以玉敦盛牲血辟開也開盟書讀之遂傳敦血徧畝戎右爲役也割牛耳盛以珠槃示神人共聽也桃桃枝荊茗蒂二物皆以辟惡畝血用之戎右贊之皆役事也

按牛耳畝血衰世但詐之事是書承襲其謬以附會周公之禮俗儒好信獎五霸而誣春秋實始作俑矣

齊齊右，下大夫二人。

齊車之右，齊敬也。祭祀賓客，齊敬之事。

齊右，掌祭祀會同賓客前齊車。王乘則持馬，行則陪乘。凡有牲事，則前馬。

齊右，王路金路之右。王祭祀則乘玉路，賓客則乘金路。前謂王未登車，則齊右執策立馬前。王乘則持馬防驚駭，既乘行，則登車立右陪乘。王在車，遇祭牲拱而式，曲禮式齊牛。王式則右下車前卻行，防馬逸，使王致敬也。曲禮云：君撫式，大夫下之。王式則齊右下。

道右，上士二人。

道道車象路也爲王道車之右

道右掌前道車王出入則持馬陪乘如齊車之儀自車上諭命于從車詔王之車儀王式則下前馬王下則以蓋從

前謂王未乘則執策立馬前道車文事之車巾車職云象路以朝是也王在車中有命則自車上傳諭副車車儀卽曲禮立視五雋式視馬尾之類王式見上蓋慘蓋從以表尊

大馭中大夫二人

掌馭王之玉路



大馭掌馭玉路以祀及犯軼。玉自左馭馭下祝登受轡。  
犯軼遂驅之及祭酌僕僕左執轡右祭兩軼。帛祭軼。犯  
乃飲。凡馭路行以肆夏趨以采齊。凡馭路儀以鸞和爲  
節。

玉路王乘以郊祀郊出國門故有行道之祭山行曰  
軼卽祭名詩云取瑟以軼郊非遠必軼重其行也封  
土象山柏棘爲主以車轅過其上示無險難曰犯軼  
王在車左大馭執轡居中祭則大馭下車祝神王自  
左執轡駐馬祝畢登車受王轡乃驅犯軼遂行祭卽  
鞅祭旣獻神酌酒獻僕僕卽大馭也左手執轡右手

舉酒澆兩軹及軹皆祭之車軸兩端曰軹軹前曰軹  
與範同凡馭路馭五路爾雅堂上謂行門外謂趨鄭  
云大寢至路門謂行路門至應門謂趨肆夏采薺皆  
樂章言疾徐中節也鈴在銜曰驚在軹曰和疾徐有  
節則驚和相應大徐則不鳴大疾則不和

戎僕中大夫二人

戎車之馭

戎僕掌馭戎車掌王倅車之政正其服犯較如玉路之  
儀凡巡守及兵車之會亦如之掌凡戎車之儀

戎車革車也倅車戎車之副正其服正衆乘戎車者

之服色戎車之儀如玉藻云戎容暨暨曲禮兵車不  
式武車綴旌之類

齊齋僕下大夫二人

朝享之事爲王馭也敬賓客如神明故曰齊僕

齊僕掌馭金路以賓朝覲宗遇饗食皆乘金路其漚儀  
各以其等爲車送逆之節

以賓謂以賓禮待諸侯卽朝覲宗遇之賓客至王饗  
食于廟有迎送之禮以其貴賤爲遠近之節詳見大  
行人及司儀職皆乘金路而齊僕爲馭

道僕上士十有二人

王尋常出入之馭

道僕掌馭象路以朝潮夕燕出入其灋儀如齊車掌貳車之政令

春官巾車職象路以朝卽道車也朝夕早晚出視朝也早曰朝莫曰夕燕出入尋常出入貳車副車副道車曰貳副戎車曰倅副田車曰佐

田僕上士十有二人

王田車之馭

田僕掌馭田路以田以鄙掌佐車之政設驅逆之車今獲者植旌及獻比禽凡田王提馬而走諸侯晉大夫馳

巾車職云木路以田取其堅朴也循行縣鄙亦用之  
佐車副車驅逐也逆迎也獲獲禽植旌謂田畢樹旗  
令獲者各獻所獲于旗下較多寡也提勒馬舉首使  
緩行也晉進通行有漸也馳騁馬也貴者徐賤者疾  
馭夫中士二十人下士四十人

副車之馭

馭夫掌馭貳車從王使車分公馬而駕治之

貳車五路之副車皆是從車公侯卿大夫從王之車  
使車聽王役使之車公馬舍官馬治之調習制馭

校人中大夫二人上士四人下士十有六人府四人史

八人胥八人徒八十人

馬官之長考驗曰校

校人掌王馬之政辨六馬之屬種馬一物戎馬一物齊  
養乘之乘馬一師四圉三乘爲阜阜一趣楚馬三阜爲  
繫繫一馭夫六繫爲廐救廐一僕夫六廐成校校有左  
右騫馬三良馬之數麗馬一圉八麗一師八師一趣馬  
八趣馬一馭夫天子十有二閑馬六種邦國六閑馬四  
種家四閑馬二種凡馬特居四之一

馬有六物以路車有五而外多騫馬也種馬良馬可

馬經卷之八 一  
爲種者以駕玉路一物猶一類戎馬駕戎車革路也  
齊馬駕齊車金路也道馬駕道車象路也田馬駕田  
車木路也駕馬不任五路以給雜役頒謂分任各役  
良馬謂五路馬皆良善者養乘畜養差配成乘四馬  
曰乘則一人爲師四人爲廐養三乘爲阜阜十二匹  
一趣馬下士也三阜爲繫繫三十六匹一馭夫中士  
也六繫爲廐廐二百一十有六匹一僕夫上士也六  
廐成一校共馬一千二百九十六匹左右二校共馬  
二千五百九十二匹此良馬之成數也下駟曰駑駑  
馬三良馬之數則當爲七千七百七十六匹兩馬曰

麗一圉牧之。八麗十六馬。一師牧之。八師一百二十八馬。一趣馬掌之。八趣馬一千二十四匹。一馭夫領之大畧。七馭夫所領得馬七千一百六十八匹。視良馬數乃可三倍。天子十有二閑。藏馬處曰閑。馬六種分十二閑。每種二閑。卽所謂左右二校。六廐成校者也。以良馬十二廐。合駑馬三倍之數。大約馬萬匹。邦國六閑。半天子馬。四種無種與戎也。家四閑。降于諸侯。馬二種無齊與道。止田駑二種耳。牡馬曰特。三牝一特。欲其生之衆也。每乘亦然。欲其以類相從也。

按鄭以十二閑六種合十二廐。爲左右校。則良馬當



爲二千一百六十四匹，五種分左右爲十廐，每一廐良馬二百十六匹，十廐共良馬二千一百六十四匹也。驚馬一種三倍良馬，當爲一千二百九十六匹。如是則驚有三廐，當爲十三閑，一不合也。且本文所謂三良馬之數者，謂天子賞賜牲幣之類，取給多，故三倍六廐。承上文校有左右之全數，非謂三倍一廐也。今獨以一廐之數三之，則通計驚馬一種，不過一千二百九十六匹，而良馬五種十廐共二千一百六十四匹，是驚馬反少良馬二之一，二不合也。義旣不通，乃改八麗八師八趣馬，三八字爲三六字，求伸前說，三不合。

也。凡鄭說牽強類此。今據本文大約駑馬七千七百七十六匹，每二匹一圉夫，共圉夫三千八百八十八人，每十六匹一師，共師四百八十六人，每百二十八匹一趣馬，共趣馬六十人有奇，每千二十四匹一馭夫，共馭夫七人有奇，其良馬二千五百九十二匹，每一匹一圉夫，共圉夫二千五百九十二人，四匹一師，共師六百四十八人，每十二匹一趣馬，共趣馬二百一十六人，每三十六匹一馭夫，共馭夫七十二人，每二百一十六匹一僕夫，共僕夫七十二人。據本文解當然實不足信也。因馬設官，官反多于馬，馬之芻牧收給

于甸賦官之廩祿十倍于馬。何所取給。自天子至諸侯皆有馬。今云家馬四閑。一良三蓄。則馬八百六十四匹。掌牧者當六百八十三人。大國卿祿四大夫。田不過三千二百畝。上農夫僅可食二百八十一人耳。祭祀賓客之需。取給外。畜馬八百六十四匹。牧者六百八十三人。何以廩贏之。而諸侯天子可推矣。是書成于周衰六國羸秦之際。諸侯強大。比于王者。制侈費汰。官冗事繁。考儀禮諸侯一聘。賞賜庭實之馬。且數十匹。安得不養馬之多乎。非先王之舊。必矣。

春祭馬祖。執駒。夏祭先牧。頒馬。攻特。秋祭馬社。減僕。冬

祭馬步獻馬講馭夫凡大祭祀朝覲會同毛馬而頒之飾幣馬執扑而從之凡賓客受其幣馬大喪飾遣車之馬及葬埋之田獵則帥驅逆之車凡將事于四海山川則飾黃駒凡國之使者共其幣馬凡軍事物馬而頒之等馭夫之祿宮中之稍食

馬祖天駟房星之神東方蒼龍之宿馬龍精也執駒方春牝牡通淫繫維其駒使離母也夏草方茂可牧故祭先代始牧馬者攻特牝馬方孕攻去其特勿使近牝馬社牧地之神秋報成故祭之臧僕簡練僕夫也馬神爲崇者曰步獻馬獻成馬于王講馭夫簡習

馭夫也。毛馬，齊馬毛色。如詩四黃四鐵之類。頒，謂給當乘者幣馬。聘享之馬，飾整刷也。扑，馬策。受幣馬，受諸侯之獻馬。遣車之馬，送葬者也。及葬埋，埋馬牲也。王遣奠用馬牲。大司馬職，喪祭奉詔馬牲。黃駒，天子過名山大川，殺黃駒以祭。黃中色。凡國之使者，謂王命勞賜諸侯，有幣馬，則供之物馬。辨別馬材力。宮中猶官府，如廄一僕夫。繫一馭夫。阜一趣馬。乘一師。匹一圉夫之類。稍，廩食。

趣楚馬。下士。阜一人。徒四人。

趣，促通。督促養馬者。馬十二匹爲一阜。十二閑共良。

馬二千五百九十二匹爲趣馬二百一十六人徒八百六十六人而駑馬三良馬之數不與焉

趣馬掌贊正良馬而齊其飲食簡其六節掌駕說稅之頒辨四時之居治以聽馭夫

良馬駕五路校人旣物而乘之皆良矣趣馬從而正其等不使閒雜調養適宜也簡六等之馬節其飢渴勞逸或駕以行或稅以止均其敘而頒之暑則出居于房寒則入居于廡春秋傳云日中而出日中而入治治其居也以聽于馭夫趣馬馭夫之屬

巫馬下士二人醫四人府一人史二人賈二人徒二十

人

馬有疾者皆使治之若神巫然

巫馬掌養疾馬而乘治之相醫而藥攻馬疾受財于校人馬死則使其賈粥之入其布于校人

疾馬羸疾之馬乘治謂乘之以試其所疾而治之相醫使其屬醫四人相視用藥受財于校人賚醫藥之費也馬死賈人計直賣之以其泉布入于校人

牧師下士四人胥四人徒四十人

掌牧馬之地

牧師掌牧地皆有厲禁而頒之孟春焚牧中春通淫掌

其政令凡田事。贊焚萊。

牧卽萊也。地不可井。則以爲牧。畜牛馬。厲列通。遮列禁樵採也。牧非一處。故頒禁。焚牧。焚陳草。使生新。通淫。合牝牡也。田事。田獵之事。春田用火。

廋人下士。閑二人。史二人。徒二十人。

廋藏也。閑以藏馬。天子馬十二閑。閑二人。共下士二十四人。

廋人掌十有二閑之政教。以阜馬。佚特。教駣。攻駒。及祭馬祖。祭閑之先牧。及執駒。散馬耳。圍馬。正校人負。選馬八尺以上爲龍。七尺以上爲騾。六尺以上爲馬。



自阜馬至圉馬九事皆政教也。阜蕃盛也。牡馬曰特。佚之。不使勞困。資生息也。馬三歲曰駝。二歲曰駒。教駝習乘也。攻駒治蹄齧也。先牧始爲閑者。執駒仲春合牝則執其駒散馬耳。以物繫馬耳使習聽不驚。圉納之閑內也。正待也。負數也。完美之稱。選擇也。校人總馬政。擇馬全善者。備五路之用也。鄭謂校人爲圉師。恐非。八尺以上卽負。選月令天子駕五路之馬皆稱龍。七尺以上諸侯之馬。詩云駉牝三千六尺以上常馬耳。

圉師乘一人。徒二人。圉人良馬匹一人。駉馬麗一人。

養馬曰圉。四馬曰乘。乘一師。十二閑共圉師六百四十八人。乘徒二人。共徒一千二百九十六人。十二閑共良馬二千五百九十二匹。圉人亦二千五百九十二人。駕馬三良馬。共七千七百七十六匹。每二馬一圉人。共三千八百八十八人。

圉師掌教圉人養馬。春除廄廄。廄始牧。夏序夏。馬冬獻馬。射則充椹質。茨牆則翦鬮。

圉師教圉人養馬。故以師名。冬寒以草爲蔭。藉馬。春除之。滌廄。殺牲。釁廄。神始牧。春草生。馬始可牧也。廄廡下。夏休馬廡下。避暑也。冬獻馬。從校人獻也。充供

也質射正也。椹剉草木。司弓矢職云射甲革椹質角力。則以木椹爲質射。而圍師供之。茨牆以草蓋牆闔蓋也。翦闔翦其亂草。椹與翦茨皆圍師所習。

圉人掌養馬芻牧之事。以役圍師。凡賓客喪紀牽馬而入陳廡馬亦如之。

圉人職見上芻以草飼馬。牧水草地。役圍師爲圍師役也。賓客之馬王所賜喪紀之馬啓殯後所薦送葬之馬入陳。謂賓客陳馬于館。喪紀陳馬于廟。犬喪廡先王之路馬而藏之亦圉人牽以入也。

職方氏中大夫四人。下大夫八人。中士十有六人。府四

人史十有六人胥十有六人徒百有六十八

職主也。方四方任重事繁故官尊人多。

按四方道里山川不屬地官屬司馬者地官主內司馬主外征伐者四方之事馬行地無疆削平叛亂九職歸貢然後司馬之事畢。詩云幹不庭方。又云經營四方大軍所至先知其情形虛實地里遠近山川險夷然後可制勝。故職方屬司馬。古命將出師曰闡以外將軍制之。以此南火西流正值坤方故夏官以地終。世儒欲移補司空非作者意。

職方氏掌天下之圖以掌天下之地辨其邦國都鄙四

周禮卷之九  
卷之九  
二二  
夷八蠻七閩九貉五狄六狄之人民與其財用九穀六畜之數要周知其利害

天下之圖卽今輿地圖按圖知地故掌圖以掌地也邦國都鄙王邦侯國及各都鄙采邑也四夷謂東夷西戎南蠻北狄閩蠻屬貉狄屬四五六七八九言其種雜而多也細數曰數總數曰要利所當貢害所當防

按職方所掌九州以內土地人民財用則中國之產也其蠻夷戎狄各舉其數此秦皇漢武之畧非先王爲治之要是書大言極誇張司馬之動啓世主好大

之志昔周公謝越裳豈以此訓後世乎

乃辨九州之國使同貫利東南曰揚州其山鎮曰會稽其澤數曰具區其川三江其浸五湖其利金錫竹箭其民二男五女其畜宜鳥獸其穀宜稻

貫習也貫利猶言便利揚州吳越也山鎮山之最大鎮歷一州者會稽在今浙江紹興府有水曰澤無水曰藪具區卽震澤在今蘇州府流水曰川三江岷江吳江錢塘江浸澤之深者五湖彭蠡洞庭巢湖太湖鑑湖也其人民七分女居五鳥獸謂多野鳥獸東南水鄉五穀宜稻

正南曰荊州其山鎮曰衡山其澤藪曰雲夢其川江漢其浸潁湛其利丹銀齒革其民一男二女其畜宜鳥獸其穀宜稻

荊州楚也衡山在湘南雲夢跨江南北北雲南夢江出岷山漢出嶓冢潁水出陽城湛未詳或曰淮也丹朱砂

河南曰豫州其山鎮曰華山其澤藪曰圃田其川滎雒其浸波澆非其利林漆絲枲其民二男三女其畜宜六擾其穀宜五種

豫中州魏地華山在今陝西華陰圃田在中牟滎堯

水與濟水同出王屋。堯東流爲濟。南渡河。溢爲滎澤。雒水。水自洛出。爲波。禹貢曰。滎波。旣豬。滎水在漢南。春秋傳。楚子梁滎。營軍臨隨。是也。馴養曰擾。六馬牛羊豕犬雞。五種。黍稷菽麥稻。此畜穀獨全者。土氣正中也。

按華山在雍州。滎水在荊州。是書以屬豫州。誤。

正東曰青州。其山鎮曰沂。宜山。其澤數曰望諸。其川淮泗。其浸沂沐。述其利蒲魚。其民二男二女。其畜宜雞狗。其穀宜稻麥。

青州齊地。今山東沂山在蓋縣。沂水所出。望諸卽孟



諸在睢陽。淮水出桐柏山，泗水出瑯琊東莞，或曰洙也。人民居四分，男女半。

河東曰兗州，其山鎮曰岱山，其澤藪曰大野，其川河洸。辨上其浸盧維，其利蒲魚，其民二男三女，其畜宜六擾。其穀宜四種。

兗州魯地，河東則西侵豫州境，岱山卽泰山，大野卽鉅野河，黃河洸，濟同。盧維未詳，鄭作雷雍，禹貢云雷夏旣澤，雍沮會同，穀宜四種，稻麥黍稷，因前後文省。正西曰雍州，其山鎮曰嶽山，其澤藪曰弦蒲，其川涇汭，其浸渭洛，其利玉石，其民三男二女，其畜宜牛馬，其穀

宜黍稷

雍州秦地嶽卽華山鄭云吳嶽山在汧西汧水出焉是爲弦蒲之藪或曰弦蒲汧浦也涇水出涇陽汧水在豳地渭水出烏鼠山洛出懷德與熊耳之洛異玉石出藍田玉山

東北曰幽州其山鎮曰醫無閭其澤藪曰獫今養其川河涕其浸菑時其利魚鹽其民一男三女其畜宜四擾其穀宜三種

幽州燕地今北直隸境醫無閭山在遼東獫養澤在徐州長廣菑水出萊蕪時水出般陽魚鹽之利東近

海也。四擾牛馬狗雞。因前文也。三種黍稷麥。亦因前  
文而地高不宜稻。鄭註恐非。

河內曰冀州。其山鎮曰霍山。其澤藪曰楊紆。其川漳。其  
浸汾。焚路。其利松柏。其民五男三女。其畜牛羊。其穀宜  
黍稷。

冀州。韓地。古帝都。霍山在燕。周人流幽王處。楊紆未  
詳。漳水出上黨。汾水出汾陽。路出歸德。人民多于他  
州者。都會之地也。

正北曰并州。其山鎮曰恒山。其澤藪曰昭餘祁。其川虜  
呼池。汜。恒。驅。夷。其浸涑。易。其利布帛。其民二男三女。其

畜宜五擾其穀宜五種

并州趙地恒山在上曲陽北嶽也鄭云昭餘祁在鄆  
庫池卽漳沱出鹵城嘔夷出平舒涑出廣昌易出故  
安五擾雞可緩也

按是書所敘九州與禹貢異禹貢有徐梁是書多幽  
并其所舉山川人物往往錯雜不似禹貢指掌可見  
華山在雍澆水在楚何以屬豫而更名雍鎮曰嶽五  
嶽皆嶽雍其爲誰嶽乎幽居極北其川澤物產皆南  
侵齊據今各方人民男女五穀六畜與是書所言多  
不合昔人謂之漬亂不驗有以也讀禹貢自覺此文

為荒陬

乃辨九服之邦國。方千里曰王畿，其外方五百里曰侯服，又其外方五百里曰甸服，又其外方五百里曰男服，又其外方五百里曰采服，又其外方五百里曰衛服，又其外方五百里曰蠻服，又其外方五百里曰夷服，又其外方五百里曰鎮服，又其外方五百里曰藩服。

此卽大司馬九畿之法，解見前服。服從也，以序環遶于外，如服之被體然。

按周之王畿原不在九服內，周之列服亦非能倍于禹貢。此因襲禹貢而加緣飾，與下封建之法皆以臆。

見增入當以禹貢爲正

凡邦國千里封公以方五百里則四公方四百里則六  
侯方三百里則七伯方二百里則二十五子方百里則  
百男以周知天下

此以開方之法計之九州地方萬里中以千里爲王  
國外九千里分侯伯子男大司徒云諸公之地方五  
百里諸侯之地方四百里諸伯之地方三百里諸子  
之地方二百里諸男之地方百里以方千里之地開  
方爲四則爲方五百里者四可以封四公開方爲六  
則各方四百里可以封六侯開方爲三百里可封十

一伯云七誤也開方爲二百里可封二十五子開方  
爲百里可封百男卽一州而八州可推

按此文分合之數以施之布帛則庶幾至于裂土必  
因山川形勢便利未有畫千里之地限尺寸分爲幾  
國者名法之家瑣碎苛刻類此孟子云海內之地方  
千里者九此前賢與要情實之語而鄭玄附會此書  
云周九州地方千里者四十有九數相應絕不知何  
據

凡邦家小大相維王設其牧制其職各以其所能制其  
貢各以其所有王將巡守則戒于四方曰各脩平乃守

攻乃職事無敢不敬戒國有大刑及王之所行先道帥其屬而巡戒令王殷國亦如之

王五載一巡守則諸侯朝于各方獄之下戒職方戒之先道王所之國先爲訓導巡戒令卽巡行脩平乃守之戒令殷衆也大宗伯職殷覲曰視謂六服盡朝也國卽諸侯亦如之亦戒令也

土方氏上士五人下士十人府二人史五人胥五人徒五十人

掌堪輿風水之事

土方氏掌土圭之法以致日景以土地相宅而建邦國



都鄙以辨土宜土化之溲而授任地者王巡守則樹王舍

土圭見大司徒職土地猶言土其地相宅相邑居土宜土氣所宜土化化瘠爲肥任地者載師之屬樹王舍爲行宮植藩籬也

懷方氏中士八人府四人史四人胥四人徒四十人掌遠人來歸者懷來也

懷方氏掌來遠方之民致方貢致遠物而送逆之達之以節治其委積館舍飲食

達之以節以旌節通其道路詳地官掌節職委積詳

遠人

合方氏中士八人府四人史四人胥四人徒四十人  
掌合同四方之事

合方氏掌達天下之道路通其財利同其數器壹其度量除其怨惡同其好善

通財利貨遷有無以相濟也同數器權衡不得有輕重壹度量丈尺釜鍾不得有大小除怨惡邦國不得相侵陵同好善習尚不得爲淫僻

訓方氏中士四人府四人史四人胥四人徒四十人  
掌宣布王化以訓四方

訓方氏掌道四方之政事與其上下之志誦四方之傳道正歲則布而訓四方而觀新物

四方之政事謂四方諸侯之政事道謂告王上下之志諸侯君臣之志傳道謂四方所傳頌稱道嘉言善事誦爲王誦正歲建寅之正月布謂以政志之善與所傳道者布而訓之觀新物觀四方新異之物察民俗之好尚也

形方氏中士四人府四人史四人胥四人徒四十人掌制四方邦國之形勢

形方氏掌制邦國之地域而正其封疆無有華花雜之

地使小國事大國大國比註小國

華雜也。離亂也。言幅員方正。不錯雜間斷也。比猶庇也。

按此上五方皆職方之屬。惟土方上士五人。懷合訓形皆中士。懷合中士八人。訓形中士四人。府史以下四方同。本無錯簡。或欲移土形補司空。移訓方屬司徒。非作者意。

山師中士二人。下士四人。府二人。史四人。胥四人。徒四十人。

掌知四方丘陵林木

月老子集 卷之三 三十一  
山師掌山林之名辨其物與利害而頒之于邦國使致其珍異之物

山林名物如岱畎絲枲嶧陽孤桐之類利材木之類害猛獸之類

川師中士二人下士四人府二人史四人胥四人徒四十八人

掌知四方川澤

川師掌川澤之名辨其物與其利害而頒之于邦國使致其珍異之物

川澤之名物如泗濱浮磬淮夷蠙珠簠魚之類

遼原師中士四人下士八人府四人史八人胥八人徒八十八人

掌知四方原野間曠之地遼原同高平曰原

遼師掌四方之地名辨其丘陵墳衍遼隰之名物之可以封邑者

司徒五地山林川澤丘陵墳衍原隰也山林川澤山師川師掌之餘六遼師掌之辨其名以知平陂燥濕辨其物以知肥磽美惡鄭以物字屬下讀未是

匡人中士四人史四人徒八人

匡正也詩云王于出征以匡王國匡人揮人蓋軍中

贊畫之職自職方至擇人十職大抵多贊畫之士

匡人掌達灋則匡邦國而觀其慝使無敢反側以聽王命

灋則卽大司馬九灋之類

擇人尋人中士四人史四人徒八人

擇擇同探也掌探討四方之事

擇人掌誦王志道國之政事以巡天下之邦國而語之使萬民和說而正王面

國之政王國之政事語語諸侯正猶對也面猶向也

使望王國歸向

都司馬每都上士二人中士四人下士八人府二人史八人胥八人徒八十人

都謂畿內王子弟及三公之封邑王爲置司馬平其政

都司馬掌都之士庶子及其衆庶車馬兵甲之戒令以國漙掌其政學以聽國司馬家司馬亦如之

士庶子卿大夫士之子政謂賦稅學謂德藝軍興則聽大司馬徵發進士則聽大司馬論材

家司馬各使其臣以正于公司馬

此職綱也目見上家謂王卿大夫之邑各以家臣主



其軍賦而受政于國司馬王不特置官

右夏官之屬七十內卿七人大夫二百二十四人上士八百七人中士三千一百四十八人下士一萬五千四百七十六人府九十四人史二百六人胥二百一十一人徒四千二百四十四人又醫四人賈八人工四人狂夫四人通計二萬四千四百三十七人而校人之屬馭夫趣馬之流尚七千九百七十有奇不與焉合之則三萬二千四百人有奇